

Inatsisartut suleriaasianni § 33 naapertorlugu Inatsisinut Ataatsimiititaliamut ilaasortat matumuuna aalajangiiffigisassatut siunnersuut tulluuttoq saqqummiuppaat:

Inatsisartut Ombudsmandiata 2024-imut ukiumoortumik nalunaarutaata Inatsisartunit tusaatissatut tiguneqarnissaa Inatsisartut aalajangiiffigisassaattut siunnersuut.

(Inatsisinut Ataatsimiititaliaq: Aqqalu C. Jerimiassen, ataatsimiititaliap siulittaasua, Atassut, Kuno Fencker, ataatsimiititaliap siulittaasuata tullia, Naleraq, Pipaluk Olsen, Demokraatit, Iddimannngiiu Bianco, Inuit Ataqatigiit, Anders Olsen, Siumut)

Tunngavilersuut:

Allaffissornerup inatsisiliornerni killiliussat pisortallu ingerlatsinerannut inatsiseqartitsinermini malittarisassat allassimangitsut iluini ingerlanneqarnissaa Inatsisartut Ombudsmandiata nakkutigisassaraa. Suliassaq tamanna uagut inatsisiliortutut Ombudsmandimut tunniunniukuupput, taamaaliornikkut – uagut sinnerluta – Naalakkersuisut inatsisinillu atuutsitsisut nakkutigineqarsinnaaqullugit. Tamatuma peqatigisaanik Ombudsmandi nunatsinni innuttaasut inatsiseqartitsinikkut innarlitsaalineqarnerannik qulakkeerinnittussaavoq, innuttaasut suliarni imminnut attuumassutilimmi pisortani oqartussaasut kukkussuteqarsimasorigunikkut Ombudsmandimut saaffiginnissinnaammata.

Inatsisartut Ombudsmandiat ukiut tamaasa Inatsisartunut nalunaaruteqartarpoq, tassanilu ukiumi qaangiuttumi suliassaminik ingerlatsisimanini Ombudsmandip nassuiaateqarfigisarlugu. Nalunaarut sulianik arlalinnik ukiumi qaangiuttumi Ombudsmandip suliarsimasaanik imaqartarpoq, soorluttaaq nalunaarut ajornartorsiutit attuumassuteqartut pillugit allaaserisanik imaqartartoq.

Inatsisinut Ataatsimiititaliaq aalajangiiffigisassatut siunnersuutip matuma saqqummiunneqannginnerani Ombudsmandimik ataatsimeeqateqarpoq. Ombudsmandip ataatsimiinnermi tassani ukiumoortumik nalunaarutip imarisaasa ilai ataatsimiititaliamut immikkut soqutiginaatillit ataatsimiititaliamut erseqqinnerusumik paasissutissiissutigai.

Pisortat ingerlatsinerannut inatsiseqartitsinermini malittarisassanik oqartussaasut malinniarnerni unammilligassat uteqqiattut Ombudsmandip nalunaarummini saqqummiuppai. Tamatumani pineqarlutik soorlu allattuisarnissamik, tunngavilersuisarnissamik, inatsisinut tunngavigneqartunut innersuussisarnissamik naammagittaalliorfissanullu ilitersuisarnissamik malittarisassat.

Malittarisassat taakku suliani innuttaasut mianernarnerpaamik inissisimaneranni illersorneqarnissaannut pingaaruteqarluinnarput.

Malittarisassat taakku ilarpassui suliassat suliarineqartarnerat pillugu inatsimmik aammalu pisortat ingerlatsinerat pillugu paasitinneqarsinnaatitaaneq pillugu inatsimmik aallaaveqarput. Suliassat suliarineqartarnerat pillugu inatsit, pisortat ingerlatsinerat pillugu paasitinneqarsinnaatitaaneq pillugu inatsit aammalu ombudsmandi pillugu inatsit siulliit 1994-imi upernaakkut ataatsimiinnermi taamani Inatsisartuusunit akuersissutigineqarput. Tassa imaappoq suliassat suliarineqartarnerat pillugu inatsit aammalu pisortat ingerlatsinerat pillugu paasitinneqarsinnaatitaaneq pillugu inatsit ukioq kingulleq ukiuni 30-ni atuussimalersut. Innuttaasunut pisinnaatitaaffiit pingaarutillit arlallit ukiuni 30-ni inatsisitigut aalajangersaavigineqarsimapput.

Pingaartumik suliassat suliarineqartarnerat pillugu inatsisip tunngaviusumik siunertaraa suliat suliarineqartarnerisa pitsanngorsarneqarnissaannut peqataaqataanissaq, tamatumalu peqatigisaanik oqartussat aalajangigaasa inatsisinut naapertuullutillu eqqortuunissaasa qulakkeerneqarnissaannut annertusaaqataasussaalluni. Tamatuma peqatigisaanik suliassat suliarineqartarnerat pillugu inatsit *minnerpaamik malitassatut inatsisaavoq*, tassa minnerpaamik malitassat inatsimmi aalajangersaavigineqarput. Taamaakkaluartoq ingerlatsinermi malittarisassat tunngavissallu tunngaviulluinnartut malinniarnarat oqartussanit unammillernartoqartinneqartoq takusinnaavarput.

Sulisoqarnikkut ajornartorsiuteqarnerup pingaartumik kommuninut unammillernartoqarsinnaanera paasisinnaagini Ombudsmandip Inatsisinut Ataatsimiititaliamik ataatsimeeqateqarnermini oqaatigeqqippaa. Ombudsmandili isumaqarpoq ingerlatsinermik inatsiseqartitsinermi malittarisassanik tunngavissanillu tunngaviusunik malinninnikkut unammilligassat annikillisinneqarsinnaasut. Tamanna Inatsisinut Ataatsimiititaliap suli isumaqatigaa.

Tamanna tunngavigalugu pisortat sulianik ingerlatsineranni pitsaassutsip innuttaasunut oqartussanullu iluaqutaasumik qaffanneqarnissaa qulakkeerniarlugu iliuusissat sorliit aallartinneqarsinnaanerannut Inatsisinut Ataatsimiititaliap oqalliseqataanissani kissaatigaa.

Taamatut oqaaseqarluni Inatsisinut Ataatsimiititaliap isumaqatigiittup Inatsisartut Ombudsmandiata 2024-mut nalunaarutaata Inatsisartunit tusaatissatut tiguneqarnissaanik siunnersuut saqqummiuppaa.

Inatsisinut Ataatsimiititaliaq peqatigitillugu Ombudsmandip 2024-mi sulianut ingerlataanut qujassuteqarusuppoq.